

堅

瓠

集

堅瓠五集卷之四目錄

雪庵和尙

鼠鬚筆

翠微八絕

秋柳

譏種薔薇

書規

裴晉公贈馬

弓手兒

杜鵬

廢紙秋葵詩

對花有感

得失有時

功名早暮

盛生奇遇

鞦韆

男女

書齋各友

乩仙咏櫓

老翁興歎

天風海濤

湯婆子

架上鷹

補濕字

遜秀才

隆慶寺塔

鬼唱

少林寺

可恃

蘓黃論詩

千字文

白鷗園

盛孔咏雪

夏景

祛瘧鬼咒

改海棠詩

榕城

題百舌

沈朗猜無題詩

一字不苟

羅江怨

千古恨

李公昂恨詞

金錠

作對

詩句短長

捨食

辭小雞詩

不脫俗

黑鷺鷥

採桑娘

草鞋詞

批改嫁

酉齋

蘭坡

比玉居

倒字詩

一字破

嘲妓

楊蹠無齒

黃上舍

遠佞人

堅瓠五集卷之四

長洲石農褚人獲學稼穡輯

雪庵和尚

雪庵和尚名暨不知其姓亦不知何官靖  
難時往來黔中遇隱士杜景賢留居白龍  
山之草菴昕夕誦經山中人不知書謂誦  
佛經不知其誦易乾卦也景賢恐有踪跡  
又不欲拂其意婉謂之曰和尚釋也而誦

儒乎和尚亦喻景賢意遂置儒經不誦誦  
觀音經又好觀楚辭時買楚騷乘小艇於  
中流讀之讀一葉則沉一葉讀畢大叫慟  
哭嘗有詩云年方十五去遊方終日修行  
學道忙說我平生辛苦事石人應下淚千  
行 看了青燈夢不成東風混雪落寒聲  
半生客裏無窮恨告訴梅花說到明死之  
日其徒問曰師死宜銘何許人和尙瞪目

曰松陽問其姓名終不荅卒後發其笥止  
百將傳一部大學衍義一部不知欲何爲  
也○或曰和尚松陽郭希賢也或又疑爲  
連州郭節從亡隨筆及拊膺錄雪庵事皆  
載吳成學傳成學浙江人爲翰林修撰京  
師陷削髮爲僧云後進士竇翰題詩雪庵  
壁云當初何不解漁樵卜得龍門避世高  
別有乾坤生晝夜更無江海作波濤持齋



皇朝詩集 卷四  
誰識得豈知太史筆如刀可謂詩史  
諒是慙周粟說法惟聞誦楚騷鐵石心腸

鼠鬚筆

蘓叔黨咏鼠鬚筆云太倉失陳紅狡穴得  
餘腐既興丞相歎又發廷尉怒磔肉餒餓  
猶分糲雜霜兔挿犁刀渠健落紙龍蛇驚  
物理未易詰時來卽所遇穿墉何卑微託  
此得佳譽

翠微八絕

僧冲邈有翠微山居八絕超悟可誦間來  
石上卧長松百衲袈裟破又縫今日不愁  
明日飯生涯只在鉢盂中臨溪草草結  
茅堂靜坐安然一炷香不是息心除妄想  
却緣無事可思量老老山僧不下堦雙  
眉恰似雪分開世人若問枯松樹我作沙  
彌親手栽  
幼入空門絕是非老來學道

轉精微鉢中貧富千家飯身上寒暄一衲  
衣 一池荷葉衣無盡數畝松花食有餘  
剛被世人知任處又移茅屋入深居 茅  
簷靜坐千山月竹戶閒樓一片雲莫送往  
來名利客堦前踏破綠苔紋 爐中無火  
已多時蚤起惟將一衲披莫恠山僧嘗冷  
淡夜深懶去拾松枝 豈是栽松待伏苓  
且圖山色鎮長青他年行脚不將去留與

人間作畫屏

咏秋柳

王與公咸咏秋柳云轉眼風流半已摧雨  
欺霜打暮江恨小蠻腰瘦雖勝舞張緒年  
衰豈見才織斷金衣眠不穩吹殘玉笛折  
堪哀井梧莫道同搖落曾拂龍舟汴水來  
日暮蕭蕭傍華門窺人名色笑空存天  
寒早散鳴蜩影雨濕還留繫馬痕白髮對

堪憐顧况金城栽更泣桓温故園園畔知  
何似一見霜條一斷魂

譏種薔薇

賈島狂狷行薄執政惡之故不與選裴度  
於興化建池亭島作詩譏之曰破却千家  
鑿一池不栽桃李種薔薇薔薇花謝秋風  
起荆棘滿庭君始知人惡其不遜然此句  
可以警世但不當施之裴晉公輩

書規

堅瓠集成呈教諸君子顧筆堆見之日好事還多事索取應填門余曰古人有云只可自怡悅不堪持贈君况大不盈掌難以覆醅安用此巾箱中物爲也已果索者日至案頭告罄戲拈壁曰每集三十錢紙張刷印錢諸公欲觀者請解杖頭錢此語稍聞于人尚有未諒者爲人攫取向我求償

迫促甚于逋負何所取辦以供人之娛玩  
復口占以告曰堅瓠雖小集艱難刷印資  
選詞誠費力採藻亦縈思持物當相贈太  
廉或書卷或異聞  
數事堪入集中者空言或見辭從君笑鄙  
吝老拙已安之昔文者公有觴政王謔庵  
有奕律余卽以此爲書規敢告同人聊破  
堅囊用資笑柄庶彼此各發歡喜心不致  
戕攢眉而已亦缺望也

裴晉公贈馬

全唐詩話白樂天求馬於裴晉公度裴贈  
以馬因戲云君若有心求逸足吾還留意  
在各姝引妾換馬之事樂天答曰安石風  
流無奈何欲將赤驥換青娥不辭便送東  
山去臨老何人與唱歌

弓手兒

汪聖錫應辰本玉山縣弓手兒喻子材楊



爲尉嘗授諸子學有兵言汪兵子可學喻  
呼視之狀貌竒偉出對試之曰馬蹄踏破  
青青草汪應聲曰龍爪擎開白白雲喻大  
驚異曰他日必爲偉器遂留授之學且以  
女字之紹興五年年十八魁天下後爲吏  
部尙書○爲御書監時食罷會茶一同舍  
就枕不起或戲曰宰予晝寢于予與何誅  
聖錫曰子貢方人夫我則不暇合坐稱善

杜鵑

杜鵑禽名又花名卽今山石榴映山紅紅  
躑躅皆名杜鵑成幹詩云杜鵑花與身怨  
斃兩何賒疑是口中血滴成枝上花王建  
宮詞云大儀前日煖房來囑向昭陽乞藥  
裁勅賜一窠紅躑躅謝恩未了奏花開花  
在江南始與榛莽相似在宮禁珍重如此

廢紙秋葵詩

辛未秋偶至虎丘佛慧庵路傍拾一字紙  
上有咏秋葵花在美人蕉側詩云還將嬌  
色媚清秋終朶輕盈也並頭體近美人應  
蓄妬名非向日若今羞朝開露浥新粧好  
暮落風邀舊影留最是花神輕薄處故招  
雙蝶惹人愁

對花有感

宋陶商翁弼有文武材工詩神宗時守欽

順二州途次葉縣觀千葉桃花有詩云三  
月宮桃滿上林一花千萼費春心葉公城  
外襄河北一樹無人色更深又對花有感  
云得莫欣欣失莫悲古今人事若花枝桃  
紅李白薔薇紫問着東君知不知

得失有時

螢雪叢說人之得失各自有時一友試罷  
聞望不著遂欲捨書學劔龍舒王先生奉

一絕云得則欣欣失則悲桃紅李白各隨  
時雖然屬在東君手問着東君也不知

功名早暮

吾猶及云許子明士楊萬曆癸卯鄉薦與  
雲間張以誠同年張有子安磐丁卯鄉薦  
稱許爲年伯許辛未成進士與安磐子世  
雍同年又稱安磐爲年伯堤邊楊柳籬邊  
菊春色秋香各有時功名蚤暮不同如此

盛生奇遇

桐下所然吳中盛生游俠青樓一日閒行  
某菴菴中老尼生所善也見生至嘻笑不  
止鼓掌謂生曰兩日作何好夢令汝快活  
死生問故尼曰五日後可蚤來幸秘勿洩  
生唯唯至日凌晨遣人邀生至則鳴鐘鼓  
禮佛號僧尼麤聚幾無容足處生不知其  
意稍坐卽趨出尼目之曰且吃齋去生以

尼意在求施探金與之尼捉生手而搯其  
指曰大不曉事生猶未喻徬徨日暮欲俟  
閒遁出尼揣知其意挽入一小房桌上明  
燭酒餚豐美令生坐扃門而出微從門外  
呼曰第噉酒勿憂寂寞生遍視室中設四  
榻茵褥帷帳悉豪貴家物每榻襲一爐香  
氣郁然帳內先有三少年各卧一榻見生  
來亦不驚異生坐更餘聞笑語啓鑰尼秉

燭引四婦人來皆治粧澹服見生而笑生  
却避不敢前尼引生袖付一少婦睨生曰  
男子漢反作態相顧各大笑三少年亦自  
帳內出婦人各挾其一就坐酌酒浪謔歡  
洽尼起曰老物且避諸婦亦笑而起各擁  
少年入帳盛生所主最少尤妖豔淫蕩已  
極四鼓尼開帳進卮酒門外輿從雜沓燈  
火繽紛各起整妝少婦贈生金合子玉簪



三  
夕  
一  
驚惜別登輿而去生偃息至曉歸家竟不  
知誰家眷屬未幾尼病死無復後會數年  
後盛生疽發于項叫號三日夜而死

鞦韆

黔俗好鞦韆燈夕尤盛歲初卽於通衢架  
木維以巨索高三四丈月色熹微婦女連  
臂踏歌拋擲至曉有立有坐有兩人對抱  
飄裾蕩影眇然飛入雲際自十五至十七

三日之內傾城塞途不復相禁視宿昔歡  
慕者任意擁抱歸父母舅姑了不爲異至  
十八日始各尋訪歸家此日已後卽稱姦  
矣萬歷戊申朱季美寓黔見鍾家婦稍出  
雞群爲四少年黝之五六日始還致訟旋  
有親黨勸息詞云元宵俗戲不合十九夜  
放歸議四人合買黃牛一頭給前夫調理  
等語長吏笑而釋之真蠻俗也

男女

女子十五至二十五補陽和血美顏色悅  
精神節而行之能成地仙二十五至三十  
五我施彼受雖無裨亦無大損耗四十已  
上能致疾若天癸既絕如枯枝吸水不異  
鬼交殺身而已男子精血少如膏雨壯如  
露零枯嫩含滋春芽吐潤老大如霜雪使  
紅顏萎黃凋謝耳

書齋各友

白樂天以詩酒琴爲三友作詩云今日北  
窻下自問何所爲忻然得三友三友者爲  
誰琴罷輒舉酒酒罷輒吟詩三友遞相引  
循環無已時江南李建勳榜竹軒曰四友  
以琴爲嶧陽友磬爲泗濱友南華經爲心  
友湘竹榻爲夢友張芝堦書齋七友各有  
五言絕句如意爲直友木榻爲夢友麈尾

爲談友劍爲俠友石磬爲清友琴爲音友  
酒鑑爲醉友顧元慶有山房十友譜各有  
贊語石屏爲端友玉麈爲談友鸞瓢爲狎  
友紫簫爲節友玉磬爲清友古陶器爲陶  
友湘竹榻爲夢友鐵如意爲直友方竹杖  
爲老友銀潢硯爲默友予草堂中亦有四  
友書卷爲益友毛穎爲健友眼鏡爲明友  
草花爲趣友莫逆於心無時不接也

乚仙咏櫓

齊東野語載乚仙咏櫓云寒岷雪壓松枝  
折斑斑剝盡青乚血運斤巧匠斲削成劍  
脊半開魚尾裂五湖仙子多奇志欲駕扁  
舟探禹穴碧雲不動曉山橫數聲搖落江  
天月閒居筆記亦有詩云誰倩公輸巧作  
成翩翩渾白逐風鷹分開水面秋烟冷斲  
敲波心夜月明船尾駕來三尺短棹頭搖

去五銖輕不堪聲作伊州調客裏聞來倍  
慘情荒山堂作吳中楊文理詩

老翁興歎

番禺舉子李彙征客遊閩越馳車至循州  
冒雨求宿田翁指一草莊庄有一老杖履  
迎實年已八十自稱韋思明因與談論諸  
家詩歌次第及李涉詩老人酷稱善彙征  
因吟云遠別秦城萬里遊亂山高下出

一作

入商州關門不鎖寒溪水一夜潺湲送客  
愁又滕王閣上唱伊州三十年前向此遊  
兮是半非君莫問青山長在水長流老人  
凄然興歎彙征重咏贈豪客詩叟愀然變  
色曰老身弱齡不肖浪遊江湖爲不平之  
事及遇李博士蒙柬此詩因而歛跡李公  
待愚擬陸士衡之薦戴若思中心藏焉遠  
隱羅浮經今一紀李旣云亡不復再遊秦



楚追愧今昔因乃潸然或持觴而酌反袂  
而歌云風雨瀟瀟江上村綠林豪客夜知  
聞相逢何用相違避世上於今半是君

天風海濤

趙汝愚題福州鼓山寺詩云幾年奔走厭  
塵埃此日登臨亦快哉江月不隨流水去  
天風常送海濤來朱晦翁摘詩中天風海  
濤四字刻於石

湯婆子

古人以煖足瓶爲湯婆黃山谷名以脚婆  
戲作詩云小姬煖足卧或能起心兵千金  
買脚婆夜夜睡天明曾文清謂山谷改竹  
夫人爲青奴則脚婆當名錫奴戲作一絕  
云霧帳桃笙晝寢餘此君那可一朝無秋  
來冷落同班扇歲晚溫柔是錫奴單宇有  
詩云坎離陶鑄布長安不厭常情冷煖看

和氣纔蒸來足下陽春便覺到人間溫柔  
異質通仙術貞節同心傲歲寒却勝少陵  
思廣厦能令貧士盡歡顏明吳匏庵寬有  
詩云笑汝皤然似一公窮冬相伴勝房空  
三緘口不思援上九轉腸應爲熱中詩咏  
懷春同少女禮云當夕稱衰翁平生知足  
渾無辱不恨公孫布被蒙庚午冬夜寒甚  
余亦戲成一律云傾倒燈前一醉哦水交

最喜所容多床空聊結歲寒友讀罷欣逢  
春夢婆早信括囊無口咎未妨放脚引天  
和青奴爾日休相妬冷淡生涯奈若何

架上鷹

崔元畧之子鉉爲兒時隨父訪韓晉公滯  
令詠架上鷹鉉曰天邊心膽架頭身欲擬  
飛騰未有因萬里碧霄終一去不知誰是  
解縑人滉曰此兒可謂前程萬里也寶歷

三年登第久居廊廟三擁節麾封魏國公

補濕字

有書少陵林花着雨胭脂濕詩于壁濕字  
爲蝸涎所蝕蕪子瞻黃山谷秦少游佛印  
見之都不記濕字各思一字補之子瞻云  
潤字山谷云老字少游云嫩字佛印云落  
字覓集觀之乃濕字也濕字出於自然而  
四字遂分生老病死之說詩言志信夫

遜秀才

吉水東山修禪師講義深邃一日有遜秀才來謂玄談霏媿題詠軒輊蓋山猿聽講日久得悟者也題解空寺云古塔凌空玉笋高斜陽半壓水嘈嘈老禪掩却殘經坐靜聽松聲沸海濤書方丈云幾曲風琴響暗泉亂紅飛墜碧龕前白雲深護高僧榻不許人間俗客眠送僧云松翠侵衣屐印

昔杖藜幾度此徘徊山僧忘却山中好去  
入紅塵不再來詠崔云遠辭華表傍禪關  
別却浮丘伴懶殘金磬數聲秋日晚雙飛  
帶得白雲還贈僧云一瓶一鉢一袈裟幾  
卷楞嚴到處家坐穩蒲團忘出定滿身香  
雪墜曇華落葉云萬片霜紅照日鮮飛來  
階下覆苔碑等閒不遣僧童掃借與山中  
麋鹿眠春景云門徑苔深客到稀遊絲低

逐軟紅飛松梢零落飄金粉童子枝頭晒  
衲衣夏景云風敲窻竹驚僧定鳥觸殘花  
墜澗香圓覺半函看已了紐針自補舊衣  
裳秋景云幾點歸鴉幾杵鐘紛紛涼月在  
孤峰清霜獨染千林樹明月漫山一片紅  
冬景云十笏房清百衲温名香長是夜深  
焚道人愛看梅梢月分付山童莫掩門

隆慶寺塔



吉州趙某嘗於城外隆慶寺建塔十三層  
規模壯麗其聚斂以百萬計時有詩云仁  
山寶塔實崔嵬那是君家把出來百萬貫  
錢民骨髓十三層土禍胚胎一堆空積無  
情木萬劫難銷入已財浪說天花誰得見  
只聞平地一聲雷咸淳庚午塔爲火所焚  
文文山有詩中一聯云四城扶起吳胥眼  
一柱燃成漢卓膾

鬼唱

桐下听然獲鹿曹中丞  
家有空舍每  
風雨凄其之夕輒見數十無頭鬼出自舍  
中雁行序立廳事齊聲而唱云沈窳細柳  
兩建旗田有一竿下有日暮雨只爭三四  
點遙望江南海潮汐其聲悲慘唱訖復以  
次入舍未幾中丞與其子孝廉某皆物故  
中外搆難家業蕩爲烏有此數十人者豈

宛鬼耶中丞初撫江南再督河漕或云兩  
建旗也前備兵蘓松駐劄婁東或所云海  
潮汐也田有一竿爲曲合下日爲曹字也  
餘俱不解

少林寺

隋大業天下亂流賊萬人將近少林寺寺  
僧議散走有火工老頭陀云爾等勿憂老  
僧一棒掃盡衆笑其妄頭陀卽持短棍衝

賊鋒當之者辟易皆遠避不敢入寺遂選  
少壯僧人百餘授棍法而去蓋緊那羅佛  
現身也至今奉法猶稱少林云

可恃

恃貴則滅恃富則敗恃勢則蹙恃力則危  
恃聰明則塞恃學問則荒恃巧則踈恃技  
則窮天下無一可恃惟貧賤可恃故曰貧  
賤可以驕人又曰貧賤而輕世肆志焉貧

賤人能讀書能鍊性胥天下恃我矣

蘇黃論詩

東坡與小妹黃山谷論詩妹云輕風細柳  
澹月梅花中要加一字作腰成五言聯句  
坡云輕風搖細柳澹月映梅花妹云佳矣  
未也黃云輕風舞細柳澹月隱梅花妹云  
佳矣猶未也坡云然則妹將何說云輕風  
扶細柳澹月失梅花二人撫掌稱善

千字文

梁武帝集王右軍千字使散騎侍郎周興  
嗣次韻爲文讀之稱善賜金帛卽今千字  
文也王鳳洲稱爲絕妙文章政謂局於有  
限之字而能條理貫穿毫無舛錯如舞霓  
裳於寸木抽長緒於亂絲固自難展技耳  
唐進士周述更撰天寶應道千字文將進  
之請頒行天下先呈宰執右相陳希烈問

曰有添換乎逖曰翻碎舊文一無添換陳  
又問翻碎盡乎逖曰盡陳曰枇杷二字如  
何翻碎逖曰惟此二字依舊陳曰若如此  
還未盡逖遂巡不敢對明吾吳陳雨泉盜  
作於赫混沌續千字文以便訓蒙但字多  
隱僻語又艱澀不能家喻戶曉文見桐下  
听然中

白鷗園

夏桂州言白鷗園改賜陶真人闢人胡龍  
江題云相公御賜是何年又見真人築墓  
田行過隣家乞新火竹籬茅舍只依然

盛孔咏雪

盛次仲孔平仲同在館中雪夜論詩平仲  
曰當作不經人道語孔云斜拖闕角龍千  
尺澹抹牆腰月半稜次仲曰甚佳惜未大  
也乃曰看來天地不知夜飛入園林總是



春平仲乃服

夏景

王遂客作夏景雨中花詞云百尺清泉聲  
陸續映瀟湘碧梧翠竹面千步回廊重重  
簾幕小枕歌寒玉 試展蛟綃看畫軸見  
一片瀟湘凝綠待玉漏穿花銀河垂地月  
上闌干曲溫叟詩話云不用浮李沉瓜事  
而天然有塵外涼思非觸熱者所知

祛癘鬼咒

一日癘埋迦醢迦二日癘墜帝藥迦三日  
癘怛唎帝藥迦四日癘者特托迦不計數  
不住口持一晝夜癘鬼遠避一由旬又云  
識人星可免癘昔文潞公花押能愈癘公  
女嘗剪收以療人又人誦少陵子璋髑髏  
血糝糊手提擲還崔大夫句癘亦頓愈他  
如懸乾蟹門畫獅皆可愈癘甚多康熙初

予患瘧十餘日不止一日正寒熱交作時  
族兄李君來問將紙硃書數字摺之繫於  
臂漸覺輕可囑勿開看至期仍繫之遂寂  
不作矣後視之上書江西人討木頭錢要  
緊要緊十一字而已豈瘧鬼不識字遽以  
爲天符律令而遠遁云

改海棠詩

宋鄭剛中之鎮蜀也眷妓閻玉忽民間遺

火延燒所居富春坊鄭於火中獲一旗上  
有改東坡海棠詩云火星飛上富春坊天  
恣風流此夜狂只恐夜深花睡去高燒銀  
燭照紅粧鄭一見曰必道山公子也

榕城

宋熙寧中間越地多植榕樹其木擁腫不  
中繩墨郡守程師孟命閩人多植之自爲  
詩曰三樓相望枕城隅臨去重栽木萬枝

試問國人行任處不知還憶使君無至今  
目爲榕城

題百舌

百舌身名聞鄭鏗題詩云生來學得百般  
聲長向枝頭弄五更只恐春隨流水去綠  
陰深處聽蟬鳴聞鄭鵬題云追逐黃鸝上  
苑遊穿花度柳亦風流於今已是朱明景  
莫弄東風巧舌頭二詩必有所刺而作

沈朗倩無題詩

沈朗倩顓無題詩云海底塵生曉未揚三  
珠春影拂扶桑安期手摘雞心果萼綠鬟  
輸鹿角漿花死不隨明月葬燕來密與好  
風商依稀夢冷仙姝廟襪底微聞帶露香  
寓閩海島石山房卧病累月賦落花詩四  
章勸罷長星酒未空避風臺畔月朦朧鶉  
啼恨血飛秦苑蝶化飢魂出楚宮斂影似

搖新步障衣香疑捲舊薰籠麗娘背指歎  
韃笑照破胭脂井底紅一神女廟前春可  
憐望夫臺上杳如年風刀急剪迴文錦月  
斧空修拾翠鈿倚破桃花逢半面強檜柳  
眼足三眠紅綃拭透相息淚夜撥琵琶訴  
別船三蕉鹿韶光惱夢牽御風仙子幾時  
還胭脂願葬長生地風雨休啼薄命天死  
不回頭看漢王去猶含淚緩胡鞭誰將一

滴澆青塚啼殺枝頭血。杜鵑三十里梨花。  
縞粉烟收將羯鼓。卸頭纏綵雲狼藉。霓裳  
後落月依稀寶瑟前。命薄鶯鶯難再嫁身。  
輕燕燕不重還櫻桃正寫天。公既私乞風  
光續少年。

一字不苟

高達夫適官兩浙觀察使過杭之清風嶺  
卽謝家東山景也題詩云絕嶺秋風已自



涼鶴翻松露濕衣裳前村月落一江水僧  
在翠微開竹房厥後達夫閱稿以月落時  
江水隨潮退止半江矣思改一字爲半字  
巡至台州事竣復登僧舍索筆改前詩僧  
云前月有一官過稱此詩極佳但一字不  
如半字改易而去達夫驚問何人僧曰義  
烏駱賓王也古人一字斟酌不苟但識見  
有遲速耳

羅江怨

羅江怨詞云里亭月影斜東方亮也金雞  
驚散枕邊蝶長亭十里陽關三疊相思相  
見何年月淚流襟上血愁穿心上結鴛鴦  
被冷離鞍熱黃昏畫角歇南樓報也遲  
遲更漏初長夜茅店滴溜松梢霽雪紙窗  
不定風如射墻頭月又斜牀頭燈又滅紅  
爐火冷心頭熱青山隱隱遮行人去也

羊腸鳥道幾回折雁聲不到馬蹄又怯惱  
人正是寒冬節長空孤身滅平湖遠樹接  
倚樓煨得闌干熱關山望轉賒程途倦  
也愁人莫與愁人說離鄉背井瞻天望闕  
丹青難把裏腸寫炎方風景別京華書信  
絕世情休問涼和熱堯山堂云楊用修作

千古恨

李涉至揚州通鑑諸寺於城外草庵中遇

一女子風鬟霧鬢泣拜道左乃故劉員外  
全白愛姬宋態也李問行止曰飄泊耳李  
不勝悲悼贈以詩云長憶雲仙至小時芙  
蓉頭上縮青絲當時驚覺高唐夢惟有如  
今宋玉知一昭陽夜燕使君筵解語花枝  
在眼前自從明月西沉海不見嫦娥二十  
年態亦爲之悲慟李因泣下歎曰白髮有  
前後青山無古今我與卿今日結成千古

之恨矣

李公昂恨詞

李公昂恨詞云釵留去年約恨易老嬌勞  
多誤靈鵲碧雲杳杳天涯各望不斷芳草  
絮香飄泊迴文強寫字屢錯淚欲汪還閣  
撩天去春脚便采局誰懽寶軫慵學階除  
拾取飛花嚼是  
多少春恨等閒吞却猛拍  
闌干歎命薄悔舊諾

金錠

桐下听然洞庭東山金駝子背尚如弓人  
稱爲金錠人家有吉事必邀金錠到門以  
爲佳讖遇吉日遠近爭致之得者爲幸駝  
一一至其家莫不奉金錢饋酒食欣然醉  
飽盈袖而歸數年家漸裕有田二十餘畝  
故膏壤里中有力某者久欲之而未遂一  
旦爲駝所得意甚恨陰中駝役訟傾其囊

田歸於有力者而駝遂貧卽有慶賀事亦無人延致矣他日偃僕田所見而興嗟鋤於田者舊佃客也相與語因及役訟謀自里中某源委甚悉駝憤然歸磨利又出入挾之思以報一日偵知某飲於姻家夜候道傍簷下更餘駝忽念言渠自昧心貧我命也何事更作惡擲刀於河返走暗中觸橋柱而踣臥地久之徐起覺腰背間有異

至家扣門其妻見而訝之曰爾何以頽然  
而亭亭然也驚笑聞於比鄰共往視果無  
復拳跼故態矣遠近傳爲異事稍有周給  
之者駝復小康人問之詭言得異方深祕  
挾及事數月後里中某忽至餽遺殷勤懇  
邀至家初峻拒而請益力不得已赴之治  
具中堂豐腆周洽酒酣又延之別館把臂  
促膝而語駝心疑之不知何意夜深欲別



方語曰自君闕除痼疾深自欣慰僕不量  
有懇於君君其許我駝問所欲某跪曰鄙  
人年踰五十止一子七齡生而姘美嬉於  
燈下足掛屏風而仆遂背曲難伸母日夜  
憐念思所以療之非君神方莫可如背接  
手當奉百金爲壽駝仰天直視不言者久  
之某笑曰豈薄百金耶不靳益也駝不覺  
慨然歎息涕泗交頤某恠問駝乃嚔吐詳

悉計擲刀之時正其子得疾之夜某聞之  
而慙然且悚然亦泣載馳之夫婦養於家還  
其田明年某復舉一兒而七齡者竟死報  
施不爽如此

作對

天啓中一巡按爲逆璫造祠楹柱題語云  
至聖至神中乾坤而立極允文允武並日  
月以常新因錄其詞以獻忠賢讀之不解

問左右何事說黃閣老蓋立極黃閣老名  
左右曰某御史爲爺作對忠賢艷然變色  
取牘抵地曰多大御史敢與我作對越召  
縱帥左右爲之解嚇始喜時海寇縱橫有  
渠魁至補陀設齋一月手題大士殿云自  
在白觀觀自在如來如見見如來其對猶  
存而御史之筆已歸烈焰且因媚而幾獲  
罪曾冠盜之不若矣悲夫

詩句短長

桐下閒談唐子畏謂祝枝山云詩之二言始於黃帝彈歌斷竹續竹飛土逐穴咄肉三言始於振鷲之詩四言始於康衢擊壤之謠五言始於蒹葭泣別之什六言始於孺子滄浪之歌七言始於漢武栢梁臺之句巫李長吉酒不到劉伶墳上土八言也杜少陵男兒生不成名身已老九言也李

太白黃帝鑄鼎於荆山鍊丹砂丹砂成騎  
龍飛上太清家十言也蘓子瞻山中故人  
庶有招我歸來篇十一言也祝云四十九  
言始自何人唐云詩有四十九言耶祝曰  
有新燕篇末句云好像燕羽城隍廟東大  
閤帝廟內西廊下立着個提八十三觔鐵  
柄大閤刀黑面孔阿鬍子周將軍鐵草鞋  
裏伸出五個腳跡頭舉座絕倒

捨食

錫山華六麻者善捨食其兄長仁以詩嘲之云捨食無過華六麻未曾坐席手先撾橫拖倒夾披坡捲帶汁連樂賜禿刘嚼快嘴邊流白沫吃光盆底露青花隔盤骨骼多又盡閒坐無聊挖口了華之捨食形容殆盡而今之捨食者幾不能肖其狀矣

辭小雞詩

紹興王少翁者爲人素吝將初出小雞一隻當年節禮旣先生先生媿而不受詩以致辭云昨日蒙君惠隻雞可憐離母未多時勸君莫把牛刀試留取籠中作畫眉

### 不脫俗

吏胥之子人言文理粗通而不脫俗父因試之以月爲題其子吟曰憑甚文書來海外海一作離給何路引到天涯更有一般違

法處夜深無故入人家其父怒曰果不脫  
俗又以庭前山茶爲題命其再咏其子又  
吟云切照庭前一樹茶緣何違限不開  
花信牌急仰東風去火速明朝就發芽  
循其父批云看得後詩愈加不法深爲  
髮指着爾速將詩內俗字一一開除庶  
望有成如敢仍前抗違取究未便慎之  
毋忽

黑路易剪



秋水涉筆工部主事某奉差來蕪燒磚某  
內閣囑求沈石田畫主事到蕪卽出票狗  
之石田到署主事出紅紙一張索畫石田  
盤膝坐地磨濃墨扯紙一半團作一毬於  
硯上蘸墨印下墨團三四用筆勾作黑鷺  
鷺題云青天一箇大霹靂千山萬山無鳥  
跡鷺鷺飛入破窰中一身毛羽變成黑寫  
畢遂拂袖而去

採桑娘

墨客揮犀戴孔子去衛適陳一事子貢子  
路從道逢採桑娘子曰南枝芻蕘比枝  
長婦曰夫子行陳必絕糧夫子不荅而徐  
行婦復曰九曲明珠穿不過回來問我採  
桑娘及至陳果絕糧陳侯以九曲明珠俾  
孔子穿之不得謂婦有先見使子貢反而  
詢之至採桑所婦無覓矣但見桑間聚泥

一踰尺許又聚泥三子貢曰桑者木也泥者土也其杜姓耶旁復有三其三娘耶適樵者過子貢問曰前村可有杜三娘乎樵者曰蘆塘荻渚遠華屋瑤草踈花傍粉墻行過小橋流水北其間便是杜家庄子貢如其言獲見三娘具述前事婦莞爾而笑曰此無難塗絲以脂繫蟻以要使徐徐而度如不肯過薰之以烟子貢得其術以告

夫子夫子如其言得攀九曲之珠花  
東之語然亦人所未聞而婦與樵曾作韻  
語七言詩何必始自栢梁也

草鞋詞

俞君宣挑燈集具有鷓鴣天咏草鞋云少  
時青青老來黃千樞萬結得成雙甫能打  
就同心結又被傍人說短長雲雨事我承  
當不曾移步到蘭房有朝一日肝腸斷

舊憐新撇路傍○草鞋名繩非見儀禮又  
名不借漢文帝履不借以臨朝曹詩遊山  
雙不借取水一軍持軍持僧家淨瓶也

批改嫁

露書莆田一寡婦求批改嫁太守易其問  
嫁誰婦荅嫁東隣穢裙陳二官易戲批曰  
批改嫁批改嫁嫁與東隣陳二官春色惱  
人眠不得月移花影上闌干嫁嫁嫁

西齋

楊南峰爲人聰刻鄰居有一鐵匠得財暴  
富里中爲之慶號因請於楊楊題云西齋  
人咸不解或問何出答曰橫看是箇風箱  
豎看是箇鐵墩聞者絕倒○有富翁鄉居  
求南峰書門對此翁之祖曾爲人僕南峰  
題云家居綠水青山畔人在春風和氣中  
上列家人二字見者無不匿笑

蘭玻

耳譚青州東門皮工王芬家漸裕棄去故業里人謀爲贈號芬喜張樂設宴一黠少題曰蘭玻衆問其義曰蘭多芬故號蘭玻從名也芬大喜厚酬之識者曰汝試徐思依然東門王皮也

比玉居

譚概有玉生行一者美甚人多嬖之沈伯

玉過其家見齋額顏曰比玉居伯玉曰此  
額殊有意移比字易出居內之古分明是  
屁古二字玉字亦王一二字分合言之乃  
王一屁古四字也王亦不覺失笑

倒字詩

景泰中有一蔭生作蘓州監郡不甚曉文  
義一日呼翁仲爲仲翁或作倒字詩謂之  
曰翁仲將來作仲翁也緣書讀少夫工馬



金堂玉如何入只好蘓州作判通

一字破

遣愁集明時一友才甚高或戲曰君能作  
四五字破否乃以君命召二句爲題應曰  
王請度之一座稱善或又云能復作一字  
破乎其人請題適見一鬚鬚過即指示之  
友應聲曰鄴衆不解爭究其說友曰鄴皮  
去毛者出

嘲妓

馮猶龍有嘲妓黃鶯兒一卷其嘲長妓云  
仰面覷妖嬈出蘭房須曲腰粉墻半露花  
容貌也不是雲粧髻高也不是繡鞋底高  
拜如折竹因風倒好姣姣太湖石畔有箇  
女曹交嘲麻妓云繡閣俏嬋娟恨朝朝費  
粉錢籠兒亂撲梨花片千圈萬圈不方不  
圓水漚滿泛青波面貼花鈿繁星拱照點

破鏡中天

楊蟠無齒

王介甫喜言農田水利有獻議梁山濼可  
涸之以爲田介甫欲行之又念水無所歸  
以問劉貢父貢父曰此事楊蟠無齒貢父  
退介甫思其說而不得呼子雱問此語何  
意雱亦不解召貢父問之貢父笑曰此易  
曉耳楊蟠梳人善作詩自號浩然居士相

公熟識之今欲涸藥爲田須別穿一梁山  
泊置此水恐此事浩然無涯也一時聞者  
絕倒

黃上舍

宋理宗時蔡公謨知其郡黃上舍封狀訟  
其妾以無子遣去索元顧錢十千蔡判云  
實封狀子判何難試問因何訴小蠻只爲  
鳳毛無所出故論鵝眼不曾還三年密意

知多少十索飛蚊亦等閒寄語桃溪黃上  
舍留些陰隲赴閻關

遠佞人

王介甫初叅大政偶閱晏元獻小詞因曰  
爲相何須作詞平甫曰偶然自喜而爲之  
顧其事業亦不止此時呂惠卿爲館職在  
坐遽曰爲政必先放鄭聲况自爲之乎平  
甫正色曰放鄭聲不若遠佞人呂大慚